



IVstus Velsius Haganus à pueris felicissimo ingenio fuit præditus. Itaq; in patria operam literis dedit, & prima rudimenta facillè percepit. Inde sese ad varias academias cõtulit, atq; artibus & linguis, in primis uerò Philosophiæ, tanto studio & successu incubuit, ut maximis philosophis per Germaniã connumeraretur. Hisce studijs quoq; Medicinã & Theologiam coniunxit, & Colonia Vbiorum inter professores susceptus fuit. Cum autẽ in religione ab alijs dissentiret, ab eo loco dimissus aliquandiu per Germaniam exulauit, atq; Franckoforti cū Ioanne Caluino Theologo Geneuensi de libero arbitrio, & alijs religionis pũctis, publicè disputauit, Quin etiam ad tempus Basileæ magna temperantia uixit, atq; suam doctrinã spargere desiderauit. Verũ & ibi dimissus, tandem certam habitationis sedẽ in Saxonia fixit, atq; omnifaria sua eruditione cũctis doctis innotuit. Scripsit is orationem, quod in Medico uariarũ artium & scientiarum cognitio requiratur: Hippocratis de insomnijs librum transtulit: in Aristotelis librum de uirtutibus, & in Cebetis tabulam commentaria edidit, atq; quædam Galeni latinitate donauit. Hoc modo factum, ut Iustus sibi magnum inter doctos nomẽ compararit, atq; etiamnum in literis celebris agnoscatur. Con. Gess.